

net op eenzel Virgaben agoen, déi an eise 4.000 Demanden, déi mer d'Joer traitéieren ..., op all eenzel do agoen, wat mer virstellen ...

Mme Martine Hansen (CSV) | Ma nee, dat ass jo keng ... Dat ass eng generell Fro!

Mme Joëlle Welfring, Ministre de l'Environnement, du Climat et du Développement durable | Ech fannen net, dass dat eng generell Fro ass. Dat do ass eppes, wat an enger Autorisatioun stoung. Ech kann Iech dat awer nosichen an da kann ech dat och schrëftlech no-reechen, wann Der dat wëllt.

Plusieurs voix | Très bien!

Mme Martine Hansen (CSV) | Et ass eppes erausge-
holl ginn, well ech reklaméiert hunn.

M. Fernand Etgen, Président | Merci der Madamm
Ëmweltministesch Joëlle Welfring, verbonne mam
Wonsch, datt do déi Äntwerten awer nogereecht
ginn.

8. 7979 – Projet de loi portant approbation du Traité entre le Grand-Duché de Luxembourg et le Royaume de Belgique concernant l'exploitation commune des aéronefs de transport A400M au sein d'une unité binationale, fait à Luxembourg, le 31 août 2021

De leschte Punkt um Ordre du jour vun haut de
Mëtten ass de Projet de loi 7979, en Traité mat der
Belsch iwwer d'gemeinsam Exploitatioun vun den
A400M-Fligere. D'Riedezäit ass nom Basismodell
festgeluecht. An d'Wuert huet elo d'Madamm Rap-
portrice vun dësem Projet de loi, déi honorabel Madamm
Stéphanie Empain. Madamm Empain, Dir hutt d'Wuert.

Rapport de la Commission de la Sécurité intérieure et de la Défense

Mme Stéphanie Empain (déi gréng), rapportrice |
Villmools merci, Här President. Här Minister, Dir
Dammen an Dir Härren, ech dierf Iech haut de Rap-
port maachen iwwer de Projet de loi 7979, an deem
et drëm geet, de bilateralen Traité mat der Belsch
bezüglech der gemeinsamer Exploitatioun vun der
A400M-Flott ze ratifizéieren.

E kleng Rapport: Am Joer 2005 war d'Finanzéierungs-
gesetz gestëmmt ginn, wat eis et erlaabt huet, am Ka-
der vun enger binationaler Unitéit ee vun aacht esou
A400M-Fligere ze kafen, fir en eeben zesumme mat
eise belsche Partner an deem gemeinsame Projet ze
exploitéieren.

Mëttlerweil ass deen A400M ganz reegelméisseg am
Asaz an d'Erfaarunge vun de leschte Joren hunn eis ge-
weisen, dass dësse Projet wichteg an och richteg war.
Dës Flott fonctionéiert ënnert der Autorité opération-
nelle vum EATC, European Air Transport Command,
an esou huet Lëtzebuerg sech iwwer dës „Pooling
and Sharing“-Programm d'Méiglechkeet ginn, eng
sënnvoll Kontributioun an der europäescher an
transatlantischer Sécherheitsstruktur ze leeschten.

D'Type vu Missiounen, déi hei kënnen geflu ginn,
sinn zum Beispill also Routinemiissiounen, Transport-
missiounen, zum Beispill am Kader vun enger Frid-
densmissioun oder an enger humanitärer Missioun,
Evakuatiounen an esou weider.

Bis elo sinn d'Modalitéite vun där Zesummenaarbecht
just iwwer en MoU gereegelt ginn, awer esou en MoU
stellt u sech keng zollend legal Basis duer, soudass mer
zesumme mat eise belsche Partner op de Wee gaange
sinn, e bilateralen Traité auszeschaffen, an dësen ass
och den 31. August 2021 ënnerschrifwe ginn.

Mam Projet de loi, dee mer haut stëmme wäerten,
gëtt dësen Traité, wéi gesot, ratifizéiert, an domadder
garantéiere mer dann och, dass d'Operationalitéit
vun der Unitéit garantéiert ass an dass mer och als
fiable Partner an der Durée zesummeschaffe kën-
nen.

Wat seet dësen Traité elo méi konkret? Also, mir eta-
bléieren domadder méi formell dës binational Unitéit
an erklären d'Modalitéite vun der Zesummenaar-
becht am Detail. Gereegelt gëtt ënner anerem déi ge-
meinsam Exploitatioun vun der A400M-Flott, also och
de Soutien logistique, d'Formation, d'Ëmsetzung
vum Programm, awer och eventuell Modifikatiounen,
déi zu iergendengem spéideren Zäitpunkt missten un
de Fligere gemaach ginn. Fir eis huet dat virun allem
och um Niveau vun der technescher Exploitatioun e
grousse Virdeel, well mer hei vum Knowhow vun eise
belsche Kollege profitéiere kënnen.

Den Traité hält esou eebe fest, dass dës binational
Unitéit vu Melsbroek aus operéiert, an hält och fest,
wéi d'Personal an d'Unitéit integréiert gëtt a wéi
d'Fluchstonne verdeelt ginn. Do ass dat dann de Ratio
eent zu aacht, esou wéi mer och ee vun aacht Fligere
kaaft hunn. An nom selwechte Schlëssel ginn och
d'Onkäscht vum de Frais d'exploitation an de Frais de
fonctionnement verdeelt.

Des Weideren ass zum Beispill och festgehalen, dass
den operationelle Contrôle un den EATC transferéiert
gëtt, woubäi mer awer och musse festhalen, dass
souwuel d'Belsch wéi och Lëtzebuerg zu all Moment
d'Méiglechkeet hunn, dovunner zréckzetrieden,
respektiv dass mer och alle béid zu jidder Moment
d'Méiglechkeet hunn, e Veto anzeleeën, falls mer eis
net un enger Missioun wëlte bedeelegen.

Dat war et zum grobe Contenu vun dësem Traité, dee
mer hei ratifizéieren. Nach séier zu den Aarbechten,
déi mer an der Kommissioun dozou gemaach hunn:
De Projet de loi ass de 15. März 2022 deposéiert
ginn. De 27. September dëst Joer huet de Conseil
d'État säin Avis ofginn. De 14. Oktober hu mer de Pro-
jet de loi an den Avis vum Staatsrot an der Kommis-
sioun analyséiert an de Rapport hu mer dunn och elo
den 12. Januar ugeholl.

Dëst war e relativ kuerze Projet de loi. Ech hoffen op
Är Ënnerstëtzung heifir, soen Iech villmools Merci fir
d'Nolauschteren a ginn heimadder och den Accord
vun der grénger Fraktioun.

Une voix | Très bien!

M. Fernand Etgen, Président | Merci villmools der
Madamm Rapportrice Stéphanie Empain.

An als éischte Riedner ass den honorabelen Här Jean-
Marie Halsdorf ageschriwwen. Här Halsdorf, Dir hutt
d'Wuert.

Discussion générale

M. Jean-Marie Halsdorf (CSV) | Merci, Här Presi-
dent. Ech wëll och relativ kuerz op dee gudden schrëft-
lechen a mëndleche Rapport, deen d'Madamm
Empain eis hei ginn huet, äntweren. Effektiv gesinn
ech dee Projet de loi an der Suite vum Projet de loi
7239 aus dem Joer 2018, wou mer eis am Fong geholl
déi finanziell Moyene ginn hunn, fir dëst iwwerhaupt
ze maachen. Ech wëll dat nach eng Kéier rappeléie-
ren. Et ass mer awer wichteg, well do gi 420 Mil-
liounen iwwer 35 Joer ausginn. An dëst baséiert nees
eng Kéier op engem MoU, Memorandum of Under-
standing, aus dem Joer 2001, wou de Charel Goerens
jo dee ganze Projet lancéiert huet. An 2005, ënnert
dem Minister Luc Frieden, ass am Fong déi Decisioun
geholl ginn, dësen A400M ze kafen.

Mir hunn zweemol bei deene Projete matgestëmmt
a wäerten dee Projet haut och hei stëmme. An ech
fannen déi Aart a Weis, dat iwwer en Traité ze maa-
chen, dat ass déi richteg Aart a Weis; et konnt net
anescht sinn. Den MoU, dee mer haut jo elo ofléisen,
dat ass dee vun 2021, wéi Der elo grad an Ärem Rap-
port gesot hutt, am August 2021 ass dee geholl ginn.

Duerfir géif ech dann den Accord gi vun der CSV, wës-
send, dass mer an zwee, dräi oder fënnf Joer kucken,
wéi dann déi detailléiert Zesummenaarbecht, déi hei
gereegelt gëtt, gräift. Mir hunn elo säit zwee Joer
Erfaarungswäerter, duerfir sinn ech iwwerzeegt, dass
dat e gudden Projet ass, a mir wäerten deen dann och
stëmme.

Merci.

Plusieurs voix | Très bien!

M. Fernand Etgen, Président | Merci villmools, Här
Halsdorf. An den nächsten ageschriwwene Riedner
ass den honorabelen Här Gusty Graas. Här Graas, Dir
hutt d'Wuert.

M. Gusty Graas (DP) | Merci, Här President. Wien
A400M seet, deen denkt un eng laang Geschicht. An
déi Geschicht geet schonn op d'Joer 2000 zréck. Dunn
ass u sech d'Decisioun geholl ginn, dee Fliger unze-
schafen. Entre-temps ass ganz vill iwwer dee Fliger
geschriwwen ginn, gefrot ginn, ganz vill Question-
parlementaire si gestallt ginn, virun allem stoung
natierlech ëmmer de Präis vun deem Fliger am Fokus.
Et gouf sech och ganz vill Surger gemaach ëm d'Quali-
téit vun deem Fliger.

Ech erënneren drun, dat viru fënnf Joer Däitschland
u sech bal decidéiert hat, fir déi Commanden erëm
zréckstellen, well et do zu enger Rei Problemer
komm war. Och war d'Liwwerung ursprénglech fir
2017 virgesinn. Deen Delai konnt och net agehale
ginn. Et dierf een och net vergiessen, dass dat u sech
deen éischte Militärfliager vun Airbus ass, wat awer u
sech eng gutt Saach ass, well mer domadder och de
Beweis geliwwert hunn, dass mer eis awer och um
europäesche Maart mat esou engem Fliger kënnen
ekipéieren.

Firwat hu mer iwwerhaupt dee Fliger deemools kauft?
Wann een zréckdenkt, fréier sinn et ganz aner Kon-
flikter ginn. Haut huet sech d'Situatioun natierlech
geännert. Ech mengen, dee Fliger gëtt virun allem
agesat a Krisengebieder, an zwar net an éischter Linn,
fir militäreschen Operatiounen duerchzeféieren, mee
virun allem, fir human Decisiounen auszuféieren. An
duerfir ass et och ganz richteg, dass mer dat Material
brauchen.

A Lëtzebuerg leescht domadder e ganz wichtege Bei-
trag. Et dierf een net vergiessen, dass mir um Niveau
vun der NATO jo net onbedéngt Musterschüler sinn.
Mir beweegen eis de Moment bei 0,7 % vun eisem
PIB, dat ass awer net onbedéngt eng berauschend
Zuel. A mir mussen ouni Zweifel an deenen nächste
Joren nach eng Rei Efforte maachen, an dat ass jo och
esou virgesinn.

An duerfir hu mer och am Joer 2001 eng éischt Kon-
ventioun mat der Belsch ënnerschrifwe. Firwat mat
der Belsch? Mee ech mengen, dat ass dee Partner,
mat deem mer am Fong geholl am enksten zesum-
meschaffen op deem Niveau. An dat erlaabt eis et ee-
ben, och besser Konditiounen ze kréien.

Natierlech ass dat en héijen Impakt op de Budget
gewiescht. De Fliger huet 168 Milliounen ouni TVA
kascht. Da kommen natierlech déi 420 Milliounen
Ënnerhalt fir déi nächst 35 Joer derbäi. Dat ass
schonn eng gewëssen Ausgab. Mee et dierf een awer
net vergiessen, dass mer domat awer och e wichtege
Beitrag leeschten. Ech mengen, den 18. Januar 2019
goufen iwwregens déi éischt 156 Milliounen bezuelt.

Här President, Dir Dammen an Dir Hären, eist Land ass selbstverständlech vill ze vill kleng, fir kënnen dee Fliger ze exploitieren. Dat geet schonn u mam Stationnement. Ech gleewe kaum, dass de Findel sech géif derfir eegnen. Dofir begrësse mir als DP och, dass mer eis och elo erëm eng Kéier mat der Belsch zesummesetzen, fir déi Konventioun hei vum 31. August 2021 eeben och ze ratifizieren.

Et däerf ee jo och net vergiessen, dass an där Konventioun awer och eng gewëssen Autonomie fir eist Land virgesinn ass. Dat heescht, mir kënnen och a priori refusieren, wann eng gewësse Missioun virgesinn ass, déi vläicht net eiseim Esprit direkt entsprécht – ech denken natierlech hei virun allem un eng militäresch Operatioun –, dass mer dann awer och kënnen soen, dass mer dat net wëllen ausféieren.

Als DP sti mer ganz kloer nach wie vor zu der Acquisitioun vum dem A400M. Mir sinn eis bewusst, dass den natierlech soll a priori eeben, wéi gesot, fir Aides d'urgence agesat ginn. Militäresch Asätz sinn natierlech net auszuschléissen. Dat soll awer net a priori déi éischt Aufgab sinn. Mee ech weisen awer drop hin, dass den A400M och scho seng Feierprouf an deem Sënn bestanen huet, dass mer schonn zwou wichteg Interventiounen gemaach hunn. Ech denken un den Afghanistan, ech denken awer och virun allem un déi 50 Frigidairen, déi am Kader vum der Covidkris an de Burkina Faso geflu goufen.

(Interruptions)

Fir eis als Demokratesch Partei, wéi gesot, ass dat heien also och erëm eng Kéier eng wichteg Decisioun, déi mer huelen. Mir bleiwen der Meenung, dass déi Acquisitioun also eng Acquisitioun ass, déi eng Wichtigkeet huet. An dowéinst sti mer natierlech och zu deem Projet de loi, dee mer haut hei decidieren; dass heescht, dass den Traité hei Gesetzeskraaft kritt.

Ech wëll och zum Ofschloss der Madamm Empain nach e Merci soe fir déi verschidde Rapporten, déi se gemaach huet, a gi selbstverständlech dann och d'Zoustëmmung vum der DP.

Ech soen Iech Merci.

M. Fernand Etgen, Président | Merci villmools, Här Graas. An da wier et un där honorabelen Madamm Lydia Mutsch. Madamm Mutsch, Dir hutt d'Wuert.

Mme Lydia Mutsch (LSAP) | Merci, Här President. Kolleeginnen a Kolleegen, dëst Gesetz mam Traité, dee mir domadder ratifizieren, ass eng wichteg Etapp am Kader vum eiser militärescher Zesummenaarbecht mat eise belschen Noperen, mee et ass awer och en Temoignage fir eis Verantwortung als NATO-Member.

Lëtzebuerg hat sech jo schonn ugangs den 2000er-Joren engagéiert, en Transportflieger vun Airbus, den A400M, ze kafen. D'Chamber hat – an dat ass schonn zum Deel hei opgeléicht ginn – dës Acquisitioun 2005 an Héicht vum 120 Milliounen autoriséiert. An 2018 huet missen nogebessert ginn: Fir d'Bedriewung sinn elo 420 Milliounen op 35 Joer virgesinn. Dat ass nawell eng zolidd Zomm.

An och wann dat scho bal üblech ze si schéngt, an net nëmme bei eis am Land, dass et Präisexplosiounen gëtt bei militäreschen Ekipementen, dierf dat an eisen Ae keng Fatalitéit sinn oder esou duergestallt ginn. An dofir si mir der Meenung, dass ee muss generell an och an Zesummenaarbecht mat internationale Partner d'Käschten am A hunn a kloer Reegelen opstellen.

Mat dëser Acquisitioun, déi mer deemno zesumme mat der Belsch gemaach hunn, brauche mer e gesetzleche Kader, fir d'Gestioun vum der gemeinsamer Loftflott ze reegelen, an dat ass och eeben den Objet vum dësem Gesetz.

D'Flott setzt sech elo aus aacht Fligere zesummen: siwe belschen an engem lëtzebuergesche Fliger. Déi Loftbasis ass zu Melsbroek, an do ass och d'Personal vun deenen zwee Länner stationéiert.

Den Traité gesäit vir, dass d'Käschte vun der Exploitiatioun a vum Fonctionnement opgedeelt ginn am Verhältnis vum der Unzuel vun de Fligere, also siween Aachtel fir d'Belsch an een Aachtel fir Lëtzebuerg. Dat mécht Sënn.

Wat d'Lëtzebuerger Personal betrëfft, déi an der Loftflott am Asaz sinn, sou si se en Deel vum der Wing 15 vun der belscher Composante vun der NATO ënnert dem Statut SOFA OTAN. Déi binational Unitéit – och BNU A400M genannt – ass operationell gesinn ënnert der Autoritéit vun der European Air Transport Command, kuerz EATC, a si ass capabel – an dat hu mer och schonn héieren –, eng grouss Spannbreet un Transportmissiounen auszeféieren.

D'Missioun vum der Flott wäerte souwuel ziviller, militärescher wéi och humanitärer Natur sinn. Mir hu jo alleguerde während der Covidpandemie oder och bei deene villen Naturkatastrophen, déi mer an deene vergaangene Joren haten, an anere Katastrophe gesinn, wéi wichteg grad déi zivill an humanitär Asätz gi sinn, fir de Mënschen an Nout kënnen ze hëllefen.

D'Missioun vum der belsch-lëtzebuergescher Unitéit kënnen souwuel an engem nationale wéi och an engem multinationalen, also multilaterale Kader stattfannen. Dozou gehéiert och d'Ënnerstëtzung vun internationalen Organisatiounen wéi eeben der NATO, der EU, awer och der UNO.

D'Kooperatioun mat der Belsch fir dës Loftflott, Här President, ass eng logesch Suite vum eiser schonn entaméierter Zesummenaarbecht mat eise belschen Noperen am Beräich vum der Verdeedegung. Mir deployieren dacks zesumme mat der Belsch Personal op Auslandsmissiounen. Déi nei Militärgelieferer, déi mer viru ronn engem Joer hei iwwer e Finanzéierungsgesetz gestëmmt hunn an déi ab 2024/2025 asazbereet solle sinn, si kompatibel mat Systemen vum eise belschen Noperen. An net ze vergiessen dee gemeinsame Bataillon, dee mat der Belsch geplangt ass an den ab 2030 soll operationell sinn an dee sécherlech ganz vill Opportunitéite fir weider Kooperatiounen mat der Belsch an um europäeschen Niveau wäert erméiglechen.

Ofschléissend wëllt ech awer och nach der Rapportrice Merci soe fir hire gewinnt – si sëtzt hei – gudden a komplette schréfflechen a mëndleche Rapport an heimat och den Accord vum der LSAP-Fraktioun ginn.

Ech soe Merci.

M. Fernand Etgen, Président | Merci villmools, Madamm Mutsch. An den nächsten ageschriwwene Riedner ass den honorabelen Här Fernand Kartheiser. Här Kartheiser, Dir hutt d'Wuert.

M. Fernand Kartheiser (ADR) | Här President, Dir Dammen an Dir Hären, ech fänke vläicht u mat zwee Mercien: engem Merci un d'Madamm Empain fir hire ganz komplette Rapport, deen och ëmmer interessant ass nozelauschteren, an engem zweete Merci un eis belsch Noperen. Well mat hinne kënnen mer ganz vill zesumme maachen, wat mer wierklech eleng net kéinte maachen. Aner Virriedner hunn dat och scho gesot. Mee déi militäresch Zesummenaarbecht ass ëmmer eppes, wat ee muss ganz genee am A behalen. Zemoos an deenen Zäiten, déi mer haut hunn, wou mer awer Krich an enger Proximitéit hunn, muss een ëmmer kucken: Wat gëtt genau gemaach a wou si Risiken, wou si Chancen, déi sech an deem dote Kontext kënnen bidden?

Et muss ee gesinn, dass multinational Unitéiten an deem Sënn eng ganz besonnesch Problematik duerstellen, well multinational Unitéiten hunn natierlech eng Rei Verdeeler. Si hunn awer och de Risiko, dass herno duerch eeben déi Matverantwortung a Matimbricatioun – géif ech soen – a Strukturen, déi net nëmme eis sinn, awer och déi Gefor besteet, dass een eventuell an Operatiounen mat eragezu gëtt, wou ee sech national net onbedéngt wëllt gesinn.

Dofir ass et ganz gutt, dass an dësem Traité déi Dispositiounen sti vum der roudere Kaart, déi Méiglechkeet, fir ëmmer ze soen: „Do maache mer net mat.“ Wann dat net de Fall wär, géif d'ADR et net matstëmmen. Well et ass wichteg, dass een och bei multinationalen Unitéiten ëmmer déi Méiglechkeet huet, fir schlussendlech selwer iwwert d'Benotzung oder den Emploi vum den eegene militäreschen Ressourcen ze decidieren.

Eng zweet Bemierkung betrëfft vläicht och d'Zukunft vum deenen Arrangementen, déi mer mat der Belsch hunn, a speziell déi gemeinsam Flott vum A400M. Do vertritt d'Belsch eis an den Negociatiounen an der OCCAR. Dat ass deen Organismus, deen eigentlech dat begleet an och zukünfteg Entwécklungen am Beräich vu gemeinsame Bewaffnungen soll kucken.

A mir géifen derfir plädieren, obscho mer dat der Belsch elo ginn hunn, dass mer awer och kucken, dass mer eng Lëtzebuerger Verriedung an der Delegatioun vum der Belsch do hunn. Mir brauchen net national an deene Gremie selwer opzetrieden, mee mir sollten awer verriede sinn, mat der Belsch zesummen, fir awer och zu all Abléck eis Interesse kënnen do ze kucken.

Eng drëtt Bemierkung betrëfft de SOFA, dat ass de Status of Forces Agreement. Deen ass ganz wichteg am Kader vum der NATO an e spillt och bei Accidenten oder wann eng Lëtzebuerger Militärpräsenz an iergendenger Form géif en Accident verursaachen am Ausland, e Schued verursaachen, och e Fliger oder eeben duerch aner Saachen. Et fänkt u bei enger Jeep, et hält op beim Fliger. Mee wou mer e Schued am Ausland géife verursaachen. A mir bezieen eis dann ëmmer op dee Status of Forces Agreement.

Mir müssen och vläicht national kucken, dass dann och déi Ëmsetzung, wann dat géif geschéien, wa mer géifen e Schued verursaachen duerch Ekipement, wat der Lëtzebuerger Arméi zouzerechnen ass, dass dann och déi Versécherungsmechanismen ouni Problem spillen. Och dat spillt bei der Reputatioun vum engem Staat a bei der Participatioun u Manövern am Ausland eng Roll.

Mir hunn et gottseidank net dacks, dass mer an esou Situatiounen kommen, mee wa mer drakommen, da muss eng Entscheedegung séier garantéiert sinn. An et wär dowéinst interessant, och eng Kéier d'Mise en oeuvre vum SOFA-Agreement op nationalem Plang ze trainieren an ze iwwerpräieren, fir dass mer dann och kéinte séier déi adequat juristesche a finanziell Äntwerte ginn am Fall vum esou engem Problem.

Eng aner Bemierkung betrëfft natierlech d'ratifizierung vum dësem Traité. Et ass ganz interessant, an an der Madamm Empain hirem Rapport gëtt nach eng Kéier deen Ënnerschied gemaach tëschent engem Traité, d'ratifizierung vum engem Traité, deen hei am Parlament gemaach gëtt ... an et gëtt ganz bewusst gesot, wat net muss vum Parlament ratifiziert ginn – an als ADR si mer och do d'accord –: Dat sinn technesch Arrangementen. Dat ass dat Eenzege, wat mer net müssen hei ratifizieren an deem Kontext: technesch Arrangementen.

Dat ass zum Beispill, wa Staaten Telefonsnummern austausche vum zoustännege Beamten, fir iergendee

Problem ze reegelen. Dat ass keen Traité, dat ass en einfachen Arrangement. Dee brauch natierlech net engem Parlament virgeluecht ze ginn.

Awer de Rescht, déi aner international Accorden, mussen engem Parlament virgeluecht ginn. A mir soen dat och ëmmer erëm an engem anere Kontext, nämlech vun deene Programmes indicatifs de coopération. Do besteet déi Praxis net. Dat ass net konform zu deenen Exigenzen, déi bei eis normalerweis missten am Parlament beuecht ginn. Dat ass elo net an Ärem Kompetenzberäich, Här Minister, mee et betrëfft awer d'Regierung, datt mer och ëmmer erëm insistéieren, datt déi Programmes indicatifs de coopération hei misste virgeluecht ginn. An deem Kontext kann een och nëmme bedauern, datt an där neier Verfassung déi Dispositioun „Les traités secrets sont abolis“ net méi do steet.

Mir sinn also mat dësem Accord mat der Belsch d'accord, aus deene Konditione, déi mer Iech genannt hunn, virun allem a prinzipiell mat där, datt mer eis zu all Abléck kënnen zrëckzéien an enger Situatioun, wou mer denken, datt e militäreschen Asaz net eisen Interessen entsprécht.

Ech soen Iech Merci.

M. Fernand Etgen, Président | Merci villmools, Här Kartheiser. An da wier et un der honorabler Madamm Nathalie Oberweis.

Mme Nathalie Oberweis (déi Lénk) | Merci, Här President. Ech wollt der Madamm Rapportrice och e grouse Merci soe fir de Rapport. A bon, et wonnt Iech net: Mir waren nach ëmmer géint den A400M, dofir wäerte mer och dergéint stëmmen, well mer d'Noutwendegkeet nach ëmmer net agesinn. An trotzdem e grouse Merci.

M. Fernand Etgen, Président | Merci, Madamm Oberweis. An de leschten ageschriwwene Riedner ass den honorabelen Här Marc Goergen. Här Goergen, Dir hutt d'Wuert.

M. Marc Goergen (Piraten) | Merci, Här President. Den A400M ass en erfollegräichen europäesche Projet. A mir kënnen och frou sinn, dass dee Fliger do war, fir zum Beispill an Afghanistan schnell agesat kënnen ze ginn an d'Leit do ze retten.

Mir Piraten hu sécherlech eng ganz kritesch Positioun zur anerer Flott vun den MRTT. Beim A400M war et awer esou, dass mer vun Ufank un déi Néidegkeet unerkannt hunn an dofir och wäerten dës Kooperatioun matstëmmen, well mer gesinn, dass hei de Wee gaange ginn ass vun enger europäescher Léisung. Eng europäesch Léisung, déi mir eigentlech a ganz ville militäreschen Dossiere gären hätten, well – si mer realistesch – Lëtzebuerg eleng esou grouss Projeten, virun allem an der Gestiou herno, net stemme kann a mir eis dofir an Zukunft och sollte weiderhin, och méi wäit wéi d'Belsch oder Frankräich, europäesch Partner an der Europäescher Unioun sichen, fir esou Projeten ze realiséieren.

Am Kader vun der NATO – eng NATO, wou mir Piraten nach ëmmer kloer derzou stoungen an och an Zukunft wäerte kloer derzou stoen – ass dat heiten ee vun eise Projeten, wou Lëtzebuerg Verantwortung iwwerhëlt, wat mer och weiderhin als Land sollte maachen.

Grad an den haitegen Zäite weist et sech, dass mer och op eng NATO ugewise sinn an dass mer eis net einfach sollten ewechducken a soen: „Mir droen net eisen Deel dozou bäi.“ Ech weess, mir hunn heibanen ëfters Diskussiounen mat der Regierung, dass mir eng aner Opfaassung hu vun deem Deel, wou mer der NATO sollten eisen Deel bäidroen, mee hei ass ee

vun de Projeten, dee mer an där Form och weiderhin ënnerstëtze kënnen.

Dofir merci un d'Stéphanie Empain fir dee guddeschrëftlechen a mëndleche Rapport, a mir wäerten dat haut matstëmmen.

Merci.

M. Sven Clement (Piraten) | Ganz gutt!

M. Fernand Etgen, Président | Merci villmools, Här Goergen.

D'Regierung huet d'Wuert, de Vizepremier- a Verdedegungsminister François Bausch.

Prise de position du Gouvernement

M. François Bausch, Ministre de la Défense | Merci, Här President, an och allen Deputéierten, déi hei Stellung geholl hunn, a virun allem fir déi breet Zoustëmmung zu deem Gesetzesprojet. Merci der Madamm Rapportrice fir dee guddeschrëftlechen a mëndleche Rapport. A virun allem och merci fir d'Unerkennung vun allen Deputéierten, vun alle Fraktiounen fir d'Konzept vun Pooling and Sharing, well den A400M ass genau dat.

Et ass zwar e belsch-Lëtzebuurger Projet – also, wat den Akaf ubelaangt an och den Entretien vun de Fligere, a wéi se sollen agesat ginn –, mee et ass awer e belsch-Lëtzebuurger Projet, deen integréiert ass a verschidden international Projeten. Zum Beispill ginn déi acht Fligere am Fong mat geréiert iwwert den EATC, wou siwen europäesch Natiounen dra si fir ze kucken, wou déi Fligere agesat ginn a wéi se solle fléien.

An ech muss och soen: Ech kann net esou richtig verstoen, datt ee seet: „Den A400M-Projet, dat ass e guddes Projekt, well dee passt an dat Konzept, an den MRTT-Projet net“, well dat ass eigentlech genau dat nammlecht. Déi MRTT-Fligere, dat ass och en europäeschen – souguer en iwwereuropäeschen, well d'Norweger sinn och mat dran zum Beispill – Projet, dee ganz genau d'nammlecht geréiert gëtt. Dat sinn och Fligere, déi kënnen fir den Transport benotzt ginn. Se kënnen natierlech och nach zousätzlech ënnerwee aner Fligere optanken. Se kënnen ëmgeandelt ginn a fléiend Spideeler. Also, et ass genau déi nammlecht Konzeptioun eigentlech wéi beim A400M. Dofir kann ech dat net richtig novollzéien, wann een dat seet. Mee bon, et ass awer jiddwerengem säi Recht, dat ze gesinn, wéi en et wëllt.

Ech mengen, datt esou Programmer generell eng gutt Saach sinn. A wann ech den ... Obschonn ech vum EATC schwätzen als Beispill, da fannen ech dat en immens reusséierte Schrëtt, datt do siwen Natiounen sech zesummegeen hunn an hir national Souveränitéit eigentlech ofginn hunn op en europäeschen Niveau, fir kënnen esou méi effikass a méi seriö Krisen ze geréieren.

Wa mer an Afghanistan bei der Evakuatioun vum Flughafen vu Kabul net déi Instrumenter gehat hätten, dann, soen ech Iech, hätte mer net vill Leit eraus-evakuéiert kritt, op alle Fall bei Wäitem net esou vill, wéi mer der elo mat deenen Instrumenter eraus-evakuéiert kritt hunn.

Dofir, dat ass eigentlech exemplaresch. An dat ass och de Wee, dee mer mussen an Europa goen. An och wann ech dem Här Kartheiser Recht ginn – an dofir steet et och hei am Text dran –, datt all Natioun innerhalb vun der Europäescher Unioun ëmmer muss d'Recht hunn, bei gemeinsamen Operatiounen, ob et an deem heite Kontext oder engem aneren ass, fir ze soen: „Mir maachen do net mat“, sou mengen ech awer, datt et wichteg ass, datt een europäesch Strukturen huet an datt och dann europäesch

Kommandostrukturen do sinn. Well et kann net sinn, datt, wa mer gemeinsam sollen effikass schaffen, wa mer d'accord waren, fir eng Operatioun ze maachen, dann awer nach géifen déi 27 Länner eenzel soen, wat dann do ze geschéien huet.

Ech mengen, dat ka jo nëmmen effikass a seriö funktionéieren, wa mer dat da gemeinsam, europäesch maachen. An dofir ass, wéi gesot, dee Projet hei ganz gutt. A mir hunn, wéi et och schonn erwänt ginn ass, dat steet och hei am Text, awer ëmmer d'Recht, wa Missiounen solle gemaach ginn, déi mer net gutt fannen, fir ze soen: „Mir sinn dergéint a mir maachen do net mat.“

Ech wëll awer hei eppes riichtbéien, wat hei elo e bësse beschönigend duergestallt ginn ass. Ech hu virun zu engem Deputéierte gesot: „Wann eppes gréng ass an deem heite Fall, a méi gréng, da soll een et och als dat ze erkenne ginn.“ Et ass en europäesche Rüstungsprojet. An do huet d'Madamm Oberweis och Recht. Si sinn an hirer Logik, si stëmmen esou Saachen net mat. Mee et ass net prioritär en humanitäre Projet, well déi Fligere si kaaft ginn un alleréischter Stell, fir militäreschen Notzung draus ze maachen, a se ginn och gréisstendeels militäreschen genotzt. Et sinn natierlech Transportfligere, et si keng Kampffligere, déi elo op d'Leit schéissen an esou weider, mee et gi militäreschen Transporter domadder gemaach. Dat war an Afghanistan de Fall. Dat war zum Beispill och de Fall am Kader vun Truppentransporter an de Mali an esou weider. Dat heescht, gréisstendeels gi se dofir agesat.

Natierlech kënnen se och humanitär agesat ginn, an dat ass och scho geschitt. Mir hunn zum Beispill schonn iwwer A400M medezinnescht Material a Regiounen transportéiert. Dat ass alles méiglech, mee mir sollen awer éierlech mat eis selwer sinn a soen, firwat et geduecht ass, well dat géif jo soss och net unerkannt ginn an der NATO, wann dat net de Fall wär. An ech mengen, dat mécht och Sënn, datt se dofir kaf gi sinn an datt se dofir och agesat ginn.

Et ass esou, datt mer sechs Piloten a sechs Loadmasteren virgesinn hunn. Mir hunn déi bis elo nach net ganz kënnen fannen an ausbilden. Bei de Pilote si mer elo op fënnf Lëtzebuurger, déi fléien, et ass e sechsten an der Ausbildung an et ass nach e siwenten, deen huet seng generell Pilotenausbildung nach net fäerdeg, déi ass awer um Lafen. Dat heescht, bei de Pilote gesäit et gutt aus.

Bei de Loadmasteren hu mer der eréischt zwee. Natierlech versiche mer weider ze rekrutéieren, mee ech sinn awer och iwwerzeegt, datt déi heite Karriären ... mindestens d'Loadmasteren, dat huet vill dermat ze dinn, datt mer eist neit Kadregesetz hunn, dat ass mat der B-Karriär zum Beispill a mat der A2-Karriär, firwat mer do keng fannen. Bei de Piloten natierlech, dat sinn Universitätsausbildungen an dat sinn Offizéiere. Dat war méi einfach ze fanne wéi bei de Loadmasteren. Bon, mee dat wäert sech, ech sinn iwwerzeegt, wa mer d'Kadregesetz bis hunn, mengen ech, och ganz séier verbessern.

Mee dat ass gutt, well da kënnen mer natierlech ganz aner Perspektive bidden, och fir Lëtzebuurger Zaldoten an enger Karriär vun der Lëtzebuurger Arméi, soit datt déi Leit natierlech integréiert sinn an der Belsch an och do eebe schaffen. Mee ech mengen, déi, déi et maachen, maachen dat mat immenser Begeescherung. An niewebäi bemierkt waren an Afghanistan bei den Evakuatiounen och zwee Lëtzebuurger Piloten am Asaz, een am A400M an een ass awer mat den C-Fligere tëschen Kabul a Pakistan hin- an hiergeflunn. A mir hunn och duerfir, dat war natierlech och praktesch, vill Informatiounen iwwert d'Situatioun aus direkter Hand vun eise Pilot kritt, dee jo hin- an hiergeflunn ass, duerfir ware mer ëmmer gutt

informéiert, wat och wichteg war fir de Repatriement vun deene Leit, déi mir wollte rapatriéieren. Also, wéi gesot, et ass insgesamt e gudden Projet.

Da wëll ech dem Här Kartheiser och nach soen: Den OCCAR, do ass et esou, datt mir en Observateursstatus dodran hunn. Mir ginn och reegelméisseg an déi Sëtzunge mat dohinner, awer net ëmmer. Wa mer net do sinn, da representéiert eis awer d'Belsch, mee mir sinn nëmmen Observateur. Mee ech ginn Iech awer Recht, dat si Saachen, wou een duerchaus ka kucken, fir vläicht och nach méi present ze sinn.

Mee souwisou ass et generell eng Fro vun internationaler Presenz vun der Arméi. Mir ginn ëmmer méi gefrot, fir Leit op international Missiounen ze schécken, mee leider si mer nach net vun dem Personalbestand hier esou opgestallt, datt mer dat alles esou honnertprozenteg kënnen erfëllen, wéi mer dat wëlle maachen an och gär géife maachen. An och do erhoffen ech mer, wéi gesot, wa mer dat neit Kadregesetz hunn, doduerjer datt mer dann e bessere Recrutement kréien, datt mer dann och méi séier weiderkommen.

Ech soen, wéi gesot, nach eng Kéier e grouse Merci fir déi breet Zoustëmmung. Et ass gutt ze wëssen, datt mer allegueren hei hannert deem Projet stinn.

Merci.

Une voix | Très bien!

M. Fernand Etgen, Président | Merci dem Här Verdeedegungsminister François Bausch. D'Diskussioun ass elo ofgeschloss.

Mir kommen elo zur Ofstëmmung iwwert de Projet de loi 7979. Den Text steet am Document parlementaire 7979².

Vote sur l'ensemble du projet de loi 7979 et dispense du second vote constitutionnel

D'Ofstëmmen fänkt un. Mir maachen elo de Vote par procuration. De Vott ass ofgeschloss.

De Projet de loi ass mat 58 Jo-Stëmmen an 2 Nee-Stëmmen ugehoill.

Ont voté oui : Mmes Diane Adehm, Nancy Arendt épouse Kemp, MM. Emile Eicher, Félix Eischen, Paul Galles, Léon Gloden, Jean-Marie Halsdorf, Mme Martine Hansen, MM. Max Hengel, Aly Kaes, Marc Lies, Mme Elisabeth Margue, M. Georges Mischo, Mme Octavie Modert, MM. Laurent Mosar, Gilles Roth, Jean-Paul Schaaf, Marc Spautz, Serge Wilmes (par M. Laurent Mosar), Claude Wiseler et Michel Wolter ;

MM. Guy Arendt, André Bauler, Gilles Baum, Mme Simone Beissel, MM. Frank Colabianchi, Fernand Etgen, Gusti Graas, Max Hahn, Mme Carole Hartmann, MM. Pim Knaff, Claude Lamberty et Mme Lydie Polfer ;

Mme Simone Asselborn-Bintz, M. Dan Biancalana, Mmes Tess Burton, Francine Closener, MM. Yves Cruchten, Mars Di Bartolomeo, Mme Cécile Hemmen, M. Dan Kersch, Mme Lydia Mutsch et M. Carlo Weber ;

Mme Semiray Ahmedova, M. François Benoy, Mmes Djuna Bernard, Stéphanie Empain, Chantal Gary, M. Marc Hansen, Mme Josée Lorsché, M. Charles Margue et Mme Jessie Thill ;

MM. Jeff Engelen, Fernand Kartheiser, Fred Keup et Roy Reding (par M. Fernand Kartheiser) ;

MM. Sven Clement et Marc Goergen.

Ont voté non : Mmes Myriam Cecchetti et Nathalie Oberweis.

Freet d'Chamber d'Dispens vum zweete Vote constitutionnel?

(Assentiment)

Et ass also esou decidéiert.

9. Résolution de M. Sven Clement au sujet de la sobriété énergétique

(Résolution déposée au cours de cette séance publique – à consulter en page 6 de ce compte rendu)

Da géife mer nach iwwert déi Resolutioun ofstëmmen, déi den honorablen Här Sven Clement am Ufank vun der Sitzung deposéiert hat, wou et drëm geet, de gesamten ekologesche Foussofrock vun der Chamber ze evaluéieren. Wëllt nach een d'Wuert zu dëser Resolutioun ergräifen?

Kënne mer iwwert dës Resolutioun à main levée ofstëmmen?

(Assentiment)

Vote sur la résolution

Wien d'accord ass, soll d'Hand an d'Luucht hiewen.

Wien ass dergéint?

Wien enthält sech?

Domadder ass dës Resolutioun eestëmmeg ugehoill.

Domat si mer um Enn vun der Sitzung ukomm. D'Chamber kënnt muer de Mëtten um 14.00 Auer nees zesummen.

D'Sitzung ass opgehewen.

(La séance publique est levée à 16.45 heures.)

30^e séance

Présidence : M. Fernand Etgen, Président | M. Mars Di Bartolomeo, Vice-Président

Sommaire

1. Ouverture de la séance publique

M. Fernand Etgen, Président

p. 21

2. Heure d'actualité du groupe politique CSV au sujet du Projet de Programme directeur d'aménagement du territoire 2023 (PDAT2023)

p. 21

Exposé : M. Gilles Roth

Débat : M. Max Hahn | Mme Cécile Hemmen | Mme Semiray Ahmedova (interventions de M. Gilles Roth et M. Marc Lies) | M. Fred Keup | Mme Myriam Cecchetti | M. Marc Goergen

Prise de position du Gouvernement : M. Claude Turmes, Ministre de l'Aménagement du territoire (intervention de M. Gilles Roth) | M. Aly Kaes (parole après ministre) | M. le Ministre Claude Turmes | M. Gilles Roth (parole après ministre) | M. le Ministre Claude Turmes | M. Gilles Roth (parole après ministre) | M. le Ministre Claude Turmes

3. Heure d'actualité de la sensibilité politique déi Léink au sujet du contrôle médical de la sécurité sociale

p. 27

Exposé : Mme Nathalie Oberweis (dépôt de la motion 1)

Débat : M. Marc Spautz (intervention de Mme Nancy Arendt épouse Kemp) | Mme Carole Hartmann | Mme Cécile Hemmen | M. Marc Hansen | M. Jeff Engelen | M. Sven Clement (interventions de Mme Cécile Hemmen, M. Claude Haagen, Ministre de la Sécurité sociale, M. André Bauler, Mme Myriam Cecchetti, M. Marc Goergen et M. Gilles Baum)

Prise de position du Gouvernement : M. Claude Haagen, Ministre de la Sécurité sociale | Mme Nathalie Oberweis (parole après ministre) (interventions de M. le Ministre Claude Haagen) | M. le Ministre Claude Haagen (interventions de Mme Nathalie Oberweis)

Motion 1 : M. Sven Clement | M. Mars Di Bartolomeo | M. Marc Spautz | Mme Nathalie Oberweis | M. Claude Haagen, Ministre de la Sécurité sociale | M. Dan Kersch

Vote sur la motion 1 (rejetée)

Mme Nathalie Oberweis | M. Dan Kersch

Au banc du Gouvernement se trouvent : M. Claude Turmes et M. Claude Haagen, Ministres.